

Variada e colurada

Segunda emna da las bibliotecas grischunas

■ (cp) Dals 10 als 16 da settember 2012 preschentan las «Bibliotecas Grischun» a la populaziun dal Grischun puspè ina retscha variada d'occurrentzas. Cun l'emna da las bibliotecas vulan las bibliotecas innovativas render attent a lur porschida multifara e regardar a las prestaziuns ch'ellas furneschan durant l'onn. Cun lur emna da las bibliotecas dals 10 als 16 da settember 2012 vulan las «Bibliotecas Grischun» cuntinuar cun il success che questa emna ha gi l'onn passà. Passa 2000 persunas dal Grischun han visità l'onn passà in'occurrentza en ina da las 54 bibliotecas publicas. Las bibliotecas da scola e communalas èn ina part integrala impurtanta d'ina vischnanca ed adempleschan incumbensas da gronda valur. Ellas na disponan betg mo da medias e da savida, mabain èn er partenarias fermas, sch'i sa tracta d'intermediar talas. Sur ina stretga collavuraziun cun las scolinas e cun las scolas consolideschan las bibliotecas lur reputaziun sco partenarias da la furmaziun e sco lieu d'emprender. Las occurrenzas durant l'emna da las bibliotecas mussan che las bibliotecas furman ina spessa rait integrala en il chantun triling e ch'ellas porschan a la populaziun ina vasta tschernna da medias e da servetschs ch'i vala la paina da trair a niz e da promover. Las «Bibliotecas Grischun» èn innovativas e progressivas.

Durant l'onn èn las bibliotecas quel-

las instituziuns da cultura e da furmaziun che vegnan frequentadas il pli savens en il chantun. Promover la lectura, interme-

diar la litteratura e las medias sco er promover la cumpetenzza d'utilisar ils mediums èn in grond giavisch da «Bibliote-

cas Grischun». L'organisaziun da las occurrenzas durant l'emna da las bibliotecas duai rinforzar la posiziun da las bibliotecas en il chantun ed en spezial en las vischnancas.

Divertent ed excitant

Durant l'emna da las bibliotecas dals 10 als 16 da settember 2012 han lieu occurrenzas excitantas e divertentas. A Cuira per exempel envida la scola chantunala a «poetry slam» cun l'artist da «spoken word» da renum internaziunal *Renato Kaiser*, en la biblioteca da la scola professiunala pon ins admirar sculpturas culticas or da cudeschs e la biblioteca chantunala porscha, en collavuraziun cun la biblioteca populara dal Grischun, sut il titel «Wo doppelt schön der Äther blaut» in'occurrentza ironicseriusa davart il tema da la litteratura en las Alps. Il giast da la biblioteca communal da Domat è *Bänz Friedli* cun sia produziun «Sy no Frage?», en la biblioteca populara da Mustér raquintan ils musicists *Oana* e *Simon Camartin* da lur aventuras, il scriptur e chatschader *Leo Tuor* legia a Scuol or da sia ovra «Settembrini» ed ils clowns Dodo e Nana procuran per divertiment en la Biblio.ludo.teca La Sorgente a Puschlav. Avais Vus interess? L'entir program cun las bibliotecas participadas da tut las regions linguisticas chattais Vus sin www.bibliothekswоче.ch.



Maletg tar la segunda emna da las bibliotecas grischunas 2012.